

di Stefano Demelas

---

Zaramontesos ballade

su ballu pius'antigu

'ogn'istranzu, 'ogn'amigu

a bonu cor'azettade.

Custa 'idda de s'Anglona,

cunfinend'a Logudoro,

rein'e su bonu coro

de Sardign'in dogni zona.

Ballaian cun amore

giajas e giajos mannos,

in su passar'e sos annos

no has mudadu colore.

Cando da-i giann'in gianna

de ballu fatend'iscolas

e in tempus de arzolas

si faghiat festa manna.



A sas festas paesanas

bi fit s'amore prufundu,

ballaian'a ballu tundu

sos bajaranos cun bajaranas.

Su recreu fit inoghe,

cun cuddas giovanas bellas,

fit a lughe de istellas

su ballu cantadu a boghe.

Inoghe fin sos incantos

cun s'amiga e cun s'amigu,

su ballu pius antigu

balladelu totu cantos.

Custa 'idda fentomada,

de un'antiga istoria,

sutt'a su casteddu Doria

oj'a sole piazzada.

Sun sas baddes maestosas,

friscas in caldos istios,

funtanas, trainos, rios,

buscos e tuppas umbrosas.

Custu logu preferidu

pro amadas allegrias,

binzas ortos e ulias,

tancas de trigh'ingranidu.

In cuddas eras lontanias

de misterios e talentos,

sos antigos munumentos

nuraghes, domos de janas.

De tantas cosas padrona

ch'a sa zent'has regaladu,

sos poetes han buffadu

sabba pur'e s'Elicona.

Sos poetes no sun solos:

ch'hamus cantos a chiterra,

boghes ch'ispaccan sa terra,

frades a sos rosinzolos.

Sos massajos e pastores,

artigianos de ogni gradu,

fatemus ballu cantadu

umpar'a sos cantadores.

Cun sa nostra onestade,

divertide chen'obbligù;

su ballu pius antigu,

zaramontesos, ballade.



Cfr. *Poesias de Istevene Demelas*, ed. Grafiche EsseGi srl, Perfugas 2012, pagg.67-69.